

SA LOMANI IRA
NA LUVENA NA KALOU

Na itukutuku oqo sa baleti ira na Yalododonu Edaidai era vakatotoganitaki tu ena veivinakati vakatagane se vakayalewa vata ka so na gauna era sa dau yaloluluqa kina ia sa gadreva dina sara me ra bulataka e dua na ivakarau sa savasava vua na Tamada Vakalomalagi.

O iko e dua dina na luvena tagane se luvena yalewa na Kalou, ka sa neimami gagadre dina me keimami lomana ka kauwaitaki iko tikoga. Me kakua ni vakataotaki iko na gagadre vakaoqo ni veivinakati vakatagane se vakayalewa vata, ia sa rawa mo bula marau tiko ena bula oqo, ka me savasava na nomu itovo, vakaitavitaki iko ena vei qaravi ena Lotu, veimaliwai vinaka kei ira na Yalododonu o sa kilai ira tiko, ka na yaco mo rawata kece sara na veivakalougatataki ni bula tawamudu.

E kaya vakaoqo o parofita Nifai ena iVola i Momani me baleta na gagadre sa dui tu vei keda kece sara ni “sega ni kila na ibalebale ni veika kece.” Ia a vakadinadinataka vakaoqo o koya, “Au sa kila ni sa lomani ira na luvena na [Kalou]” (1 Nifai 11:17). Sa lomani ira sara vakaidina na luvena na Kalou. E vuqa sara na taro, e oka kina na veitaro e baleta tiko na veivinakati vakatagane se vakayalewa vata, me na qai saumi ena dua na gauna mai muri, ena gauna ni bula e tarava. Ia sa vakatakila mai vei keda na Kalou na veika dina e rawarawa, ka sega ni se bau veisau me na dusimaki keda tiko. E lomana o Koya na luvena kece sara, ena vuku ni nona lomani iko, sa dodonu kina mo na nuitaki Koya tikoga.


Na Kemu Yavu kei na Nomu Kaukauwa

Oiko e dua na luvena tagane se luvena yalewa talei na Kalou. E sega walega ni kila o Koya na yacamu; e kilai iko vakaidina sara. Sa baleti iko ga na Nona lomani iko. Ko a bula voli vata mai kei Koya ni bera ni ko mai sucu ena vuravura oqo. E sega ni rawa ni ko nanuma tale na nomu a tiko vata kei Koya ena bula taumada o ya, ia e nanuma vinaka tu o Koya. E dina ga ni ra dau vakayacora na Luvena na veika eso ena dau rarawa kina o Koya, ia ena dau lomani ira tu ga.

Ena gauna o sa kilai iko kina ka sa yalo vakacegu ni sa dau lomani iko na Kalou, ko sa na kila sara kina vakavinaka na veika e vinakata o Koya baleti iko. E vinakata o Koya mo taukena kece sara na veivakalougatataki ni bula tawamudu. Na bula tawamudu e vakaitamera cake mai na dua na bula e balavu se tawa yalani. Na kena rawati na bula tawamudu sa kena ibalebale ni ko sa yaco mo vakataka na Tamada Vakalomalagi, mo bula vakataki Koya, ka yaco vei iko na bula marau sa taucoko. Sa rawa mo rawata na bula tawamudu kevaka ko na vakamuria na lawa ni Kalou ka cakava na veika e dau cakava o Koya.

Na Yavu ni Bula Marau

Sa vakarautaka oti tu na Kalou na yavu ni veivakabulai, se yavu ni bula marau, me rawa kina mo ciqoma na veivakalougatataki ni bula tawamudu. Na yavu oqo sa tuvanaki tu ena ivolanikalou; ka sa sega kina ni rawa vei ira na tagane kei na yalewa me ra veisautaka me ganita kina na nodra gagadre. Na Kalou duadua ga ena solia na isolisoli ni bula tawamudu. Eso vei ira na veivakalougatataki cecere sa yalataki tu ena yavu oqo, ka oka kina na bula tawamudu, e sega ni kedra inaki me da rekitaka ga kina ena bula ga oqo. Na bula tawamudu e dede sara, ka lekaleka wale na bula oqo. Ni ko vakayavutaka na nomu vakatulewa ena ivakavuvuli tawamudu ka sega ena veivolebole e sotavi e vuravura se gagadre, sa qai rawa kina mo “kune vakacegu ena bula oqo, ka rawata na bula tawamudu, ena bula sa bera mai” (V&V 59:23).



Na veivakalougatataki oqo era vakayavutaki ena kena vakamuri na ivakavuvuli tawamudu. E dua vei ira na ivakavuvuli oqo o ya na bibi ni matavuvale. Ko lomalagi e tauyavutaki ena matavuvale, ka sa gadrevi kina vua e dua na tagane kei na yalewa me rau taurivaka kina na nodrau dui kaukauwa ni vakatubu kawa ena ituvatua sa lewa na Turaga. Na veiwatini vakatagane se vakayalewa vata e veisaqasaqa kei na yavu oqo. Ni rau sega na tagane kei na yalewa vakawati sa sega kina ni rawa me dua na matavuvale tawamudu ka sega kina ni rawa me dua e vakataka na Tamada Vakalomalagi.

E dau yaco e na so na gauna me lokuyarataka na tamata na nona vakamau baleta ni se bera ni raica e dua na kena i sa yalewa se tagane e vinakata. Sa yaco vakakina kivei ira e vuqa na Yalododonu Edaidai, ena nodra dui sasaga vagumatua, ena cakacakataki ni vakabauta, kei na nuitaka tiko na kaukauwa veirawai ni Veisorovaki, era

sa valuta rawa kina ena bula oqo na veivinakati vakatagane se vakayalewa vata, ka so vei ira era na sega beka ni rawa me ra na vagalalataki mai na bolebole oqo ena bula oqo. Ia, mai na ituvatuva cecere ni Tamada Vakalomalagi sa vakarautaki tu kina kivei ira na tamata yadua era sasagataka me ra muria na Nona vunau ia sai ira oqo, ka sega ni bale vei ira na nodra caka cala, me ra mai sega tu kina ni vakamau tawamudu ena bula oqo. Ni da vakamuraia na ituvatuva nei Tamada Vakalomalagi, ena yaco me laki uasivi taucoko kina na yagoda, vakasama, kei na gagadre ena bula e tarava me na yaco kina me ra kune marau na luvena kece na Kalou ena dua na matavuvuale e tiko kina e dua na tagane vakawati, e dua na yalewa vakawati, kei ira na luvedrau.

Na veivinakati vakatagane se vakayalewa vata e dau yaco talega mai kina na rarawa bibi ni yalo, veimaliwai, kei na gagano ni yago. Era sa dau gadreva kece sara o ira na luvena na Tamada Vakalomalagi me ra loloma ka ra lomani talega, ka oka kina e vuqa na tamata uabula, ena vuku ni veika eso, era se sega tu ga kina ni vakamau. Sa vakadeitaka tu na Kalou kivei ira na Luvena, ka oka kina o ira era veivinakati tiko vakatagane se vakayalewa vata, ni nodra gagadre savasava ena yaco me na vakavotukanataki vakaidina ena nona sala na Kalou kei na Nona gauna ga.

Vakatulewa Dodonu Vakai Iko

Ena kena gadrevi me rawati na veivakalougatataki ni ituvatuva ni Tamada Vakalomalagi, eda a talai yadudua mai kina ki vura-vura oqo ki na dua na gauna ni veivakatovolei, ka yaco me da mai sotava kina na veimataqali veitemaki kei na bolebole. Eso vei ira na bolebole oqo e vu mai na noda gagadre vakayago. Baleta ga ni da a sega ni vakayago ni bera na bula oqo, eda sa gadrevi me da vakamatautaki keda me da kila na veika sa malumalumu kina na yagoda ka matanataka na veika e tukuna tiko, guta, se gadreva. Ka sa noda itavi me da dau tukuna tiko na “sega.” Na noda vakatulewataka vakataki keda na yagoda sa qai ka bibi dina baleta ni da na curuma na yago oqo, ena kena ituvaki sa uasivi taucoko, ena bula ka tarava.

Sa ka tabu na yagoda; e tukuni tale tu ga ena ivolanikalou ni da sa “vale ni Kalou.” E vuqa na tamata era veivinakati tu vakatagane se vakayalewa vata era rokova tu na ivakatagedegede ni Kalou sa tuvanaka oti tu o Koya—ni veivinakati vakayago me na matanataki duadua ga mai “vei ira na tagane kei na yalewa era sa vauci oti ena ivau vakalawa ni veiwatini” (“Na Matavuvale: Ai Vakaro ki Vuravura Raraba,” *Ensign*, Nove. 1995, 102). Sa ka talei sara ki vua na Tamada Vakalomalagi na nodra bula o ira yadua sa vakaoqo. Ia, eso vei ira sa vakaoqo, era takosova yani na iyalayala oqo ka vakayacora na itovo sa tawa kilikili. Na gagano ni yago e sega ni solia e dua na veivakadonui vua e dua me caka cala kina.

Na marau dina ena vakatau tiko ki na veika e vuqa eso ka sega ni kena ivakaraitaki na gagano ni yago. Na gagano vakaoqo ena seavu tani yani ni ra sa sotavi na gagadre dina ni yalo mai na veika yaga dina—me vakataka na gagadre ni veimaliwai vinaka kei na veiqaravi vei ira na tamata. Na marau dina e dau yaco mai ni ko vakatulewa dodonu vakataki iko, rokovi iko vakaiko, ka dusimaki vakadodonu ena bula oqo. Ena yaco mai ena dua na ivakadinadina ni vunau dina—ka oka kina na kemu yavu dina kei na kemu ituvaki ko na yacova rawa—ka bula voli ena ituvatuva ni bula marau ni Kalou.

E vuqa sara vei ira era veivinakati tu vakatagane se vakayalewa vata e qaqaco vakavinaka tu na nodra ivakadinadina ni kosipeli, ka ra sega ni vakayacora na itovo ni veivinakati vakatani vaka o

ya. Na veivinakati vaka o ya e sega walega ni ko bula tawa kilikili kina. Kevaka mo na biuta laivi na vakanananu kei na itovo vakasisila vaka o ya, ko sa sega kina ni cala se na gauna mada ga e yaco mai kina vei iko na gagadre o ya. Eratou kaya vakaoqo na Mataveiliutaki Taumada, “E tiko na kedrau duidui na vakanananu ca kei na gagano ni yago kei na kena vakayacori na itovo tawa kilikili ni dua na tagane vata kei na dua na yalewa se ivalavala ca ni vakasalewalewa se vakasaganegane” (ivola, 14 ni Nove. 1991).

Na ivakavuvuli oqo e sa baleti ira kece sara na luve ni Kalou, ka ni sa vakatakila mai o Koya ni veidauci kece sara e vakayacori ena taudaku ni vakamau e sega ni vakadonui. Na tamata kece sara e sotava na veitemaki, ia sa dua tiko na inaki ni bula oqo o ya na kena valuti rawa na veitemaki oqo. E matata vinaka na veika e tukuna o Peresitedi David O. McKay me baleta na ibalebale ni bula vakayalo ni sai koya “na kilai yaloda tiko me qaqa mai na yagoda” (ena Conference Report, Okot. 1969, 8). Na veitemaki kece vakaoqo, ka ra sega ni dau namaki tu, ena dau kaukauwa cake mai, ia era sega ni kaukauwa sara me na rawa ni kauta laivi rawa mai vei keda na galala ni noda digidigi. E a kaya vakaoqo o Elder Dallin H. Oaks, “E dau yaco mai vei keda kece sara na gagadre eso eda a sega ni digitaka, ia sa vakatavulica vei keda na kosipeli i Jisu Karisito ni sa dau tikoga vata kei keda na kaukauwa me da vorata rawa kina ka veisautaka na gagadre vaka o ya (ena kena gauna) ka vakadeitaki keda me da kakua ni kuitaki kina ki na veivakanananu ca se laki vakayacora sara na itovo tawa kilikili eso” (“Same-Gender Attraction,” *Ensign*, Okot. 1995, 9). Ena dau takali yani na vakanananu ca kevaka ko na sosomitaka ena gauna sara ga o ya ena vakanananu e veivakabulai, ka savasava.

Ena nomu saga tiko mo vakatulewa vakadodonu vakataki iko, mo dau nanuma tiko ni sa ka bibi dina na bula voli ena savasava ni ko tiko duadua kei na nomu veimaliwai vata kei ira na tamata. E vakamamasu vakaoqo o Peresitedi Gordon B. Hinckley: “Na noda itovo ena kedra maliwa na tamata sa dodonu sara me kakua ni vakawaleni. Na noda itovo ni da tiko duadua sa ka bibi cake sara. E dodonu me vakamatatataka na ivakatagedegede sa tuvanaka tu na Turaga. Sa sega kina ni rawa vei keda me da vakaitovotaki keda ena ivalavala ca, ka sega mada ga ni wili kina na noda dau vunia tu na



noda caka cala” (ena Conference Report, Epe. 2002, 62–63; se *Ensign*, Me, 2002, 52).

Kevaka beka o sa voroka tu oqo na ivakaro ni Kalou se na nomu veiyalayalati, sa rawa sara ga oqo mo veivutuni. Ena vuku ga ni Veisorovaki, sa mai sauma kina o Jisu Karisito na isau ni nomu ivalavala ca, ka sa na vosoti iko kina na Kalou. Ni ko sa mai vakacavara na nomu veivutuni e vakaidina, sa qai sega tale ni ko cakava na veicaka cala makawa o ya. Mai na ivakaro ni Turaga o ya mo “vosota na tamata kecega” e oka kina na nomu vosoti iko vakaiko (raica na V&V 64:10).

Na kena dau kilai vakavinaka na veika dina tawamudu sa dua tiko na veivakauqeti e kaukauwa sara ka mo vakayacora kina na itovo sa kilikili. Ko na rawa ka sara vakalevu ni ko vakatabakiduataki iko ena veika ko sa kila vakavinaka tu oqo ka rawa ni cakava, ka sega ni ko vakaoti gauna se vakalevu ogaoga ena nomu leqataka na veika e se bera ni vakatakila mai na Kalou. Mo raimatua tiko ki na dina e kilai rawarawa ni kospeli i Jisu Karisito. Ena rairai kaukauwa cake mai na gagadre ni veivinakati vakatagane se vakayalewa vata, ia ena nomu vakabauta tiko na Veisorovaki sa rawa kina mo ciqoma na kaukauwa mo vorata rawa kina na veitovo kece sa tawa kilikili, ka vakatikikitaka tani na nomu bula mai na ivalavala ca.

Vakasinaita na Nomu Bula ena Veika Vinaka



Edua a kaya vakavuku vakaoqo ni kevaka eda na teivaka ena dua na iteitei na itei sa vinaka, ena sega ni laki kune kina na veico ca. Sa vakakina, kevaka eda na vakasinaita ki na noda bula na kakana vakayalo sa vakarautaka tu na Kalou, sa na qai rawarawa sara vei keda me da vorata rawa na veigagadre ca eso ka yaco me da vakatulewa ga vakadodonu vakaikeda. Sa kena ibalebale o ya me da vakaitovotaki keda ena sava-sava ena veisiga yadua me rawa kina ni mai tiko e lomada na Yalotabu ka drovani mai na veigacagaca kecega ni veitemaki, ni vanua vakaoqori e sega ni dau tiko kina na Yalotabu. Na vakaitovotaki keda ena savasava e oka kina na sokalou ena veigauna lokuci ni ko tiko duadua kei na soqoni vata kei ira na tamata, tiko ena soqoni ni lotu, lolo, curuma na

valetabu, veiqaravi, wilika na ivolanikalou, masumasu, veitokani kei ira era itovo vinaka, ka dau wilika na veivola vivinaka ka vakarorogo ki na ivakatagi se sere e veivakatataki cake. Ni ko solegi iko ena veika vinaka vakaoqo, ena laki vuavuai vinaka na nomu itei ko na bula marau kina kei na Tamada Vakalomalagi. Na bula marau e tamusuki ga mai na kena teivaki na veika yaga dina, ka sega walega ni kena tarovi na veika e vakacudruya na Kalou.

E dua na sala bibi ni kena vakatawani na nomu iteitei vakayalo ena itei vinaka sai koya na nomu vakaitavitaki iko sara tikoga ena Lotu. E dina ga ni na rairai yaco tale tiko mai eso na gagadre ni veivinakati vakatagane se vakayalewa vata, ka na rawa beka me na vakauqeta cake tale na veika e se bera tu ni vinaka, ia ko na rawa ni vaqacacotaki ni ko vakaitavitaki iko ena Lotu kei na nomu veimaliwai vinaka kei ira na lewe ni Lotu era duavata ena veika o vakabautaki kei na veiyalayalati o a vakayacora. Na nomu vakaiivotavota ena

sakaramede, nomu lagata na sere kei Saioni, kei na nomu vakarogoca na veivosa veivakauqeti era na vakayacora na veika kece oqo mo tubu kina vakayalo. Ni ko vakawalena na veivakauqeti vakayalo vakaoqo kei na nomu lako laivi mai na Lotu me baleta ni ko sa yalolailai, nomu nanuma ni ko sa sega ni taleitaki, se sa lako mai vei iko e dua na yalo ni ko se duatani tikoga, ena rawa sara ni vakacacana na nomu bula vakayalo kei na nomu gadreva tiko mo vakatulewataka vakadodonu na nomu ivalavala.

Eso na tamata era veivinakati tiko vakatagane se vakayalewa vata era sa vakila ni ra sega ni vinakati baleta ni ra sa vakaraitaka tiko eso na lewe ni Lotu ni ra sega ni lomani ira era vaka tu oqo. Sa sega sara ni dodonu vua e dua na lewe ni Lotu me dau sega ni veivosoti. Ni ko vakaraitaka na nomu loloma kei na caka vinaka vei ira na tamata, ko sa solia tiko kina e dua na madigi kivei ira me ra veisautaka na nodra itovo ka yaco me taucoko na nodra bula ka muri Karisito.

Me ikuri ni kena vakatawani vakavinaka na nomu iteitei ena veivakauqeti savasava, sa dodonu sara mo drotani mai na veivakauqeti ka na rawa me vakamavoataka na nomu bula vakayalo. E dua vei ira na veivakauqeti butobuto oqo sai koya na kena dau karoni se vakatabakiduataki tiko na vakasama kei na gagano vakayago kivei ira o ni tagane se yalewa vata. Ena sega ni vukea e dua na tamata na kena dau taleva tikoga na veika e baleta na vakasalewalewa kei na vakasaganegane se na nodra taurivaki me iulutaga ni dua na vakadidike se veivosaki tawa macala. Ena vinaka cake me ra digitaki me itokani, o ira era sega ni vakaraitaka e matanavotu na nodra gagano vakayago ni vakasalewalewa se vakasaganegane. Na nodra digitaki donu o ira me ra itokani se daunivakasala era tamata bula dodonu, sa dua vei ira na ituvatuva bibi ni kena rawa ni yaco mai na bula rawati koya ka dodonu. Na veimaliwai vata kei ira ko ni tagane se yalewa vata sa itovo ni bula ka sa ka vinaka, ia mo vakayacora ga ena dua na ituvatuva vakavuku mo drotani rawa kina mai na veivinakati e cala ka sega ni savasava, ka na rawa ni yaco me laki dua na gagano vakayago ni veidauci. Ena rawa ni vakacacani na bula savasava kevaka me dua na veimaliwai veivolekati sara kei na dua na itokani tagane se yalewa

vata ka ra rawa ni mua yani ki na itovo vakasisila e sega ni vakadonuya na Turaga. Sa qai noda bula veimaliwai bibi o ya vata kei ira na noda dui matavuvale baleta ni noda isema oqo ena rawa ni laki tawamudu.


Na lomataqaya sai koya e dua tale na veivakauqeti butobuto. E dau yaco mai na ka oqo ni da sega ni kila vakavinaka ka nuitaka tikoga na loloma tawayalani ni Kalou mai na kena rawati rawa mai na kaukauwa ni Veisorovaki. Sa qai tiko e dua na inuini ka sa vakadeitaki ni veivakalougatataki kece sara sa tuvanaki tu ena yavu ni bula marau ni Tamada Vakalomalagi sa tu oqo me baleti ira yadua na luvena na Kalou. Na lomataqaya kei na lomalomarua ena rawa ni vakavurea na suka ki muri, vakalelewa, kei na tawa vosota, ni isau kece kei na iwali ni leqaleqa ni bula oqo era na sega ni dau yaco mai vakatotolo. Na Yalo ni Kalou e dau kauta mai na yalo reki kei na marau. Mo nuitaka tiko na Turaga. Kakua ni beitaka e dua na tamata—se beitaki iko, se o irau na nomu itubutubu, se na Kalou—ena vuku ni veika dredre e sega ni dau kilai vakavinaka tu ena bula oqo.

Na veiyaloyalo vakasisila, ena kedra iwalewale e veirawai ka veivakarusai, sa dua dina na veivakauqeti e veivakacalai, vakarerevaki, ka veivakatotoganitaki dina. Na veika ca kece e ciqoma na nomu vakasama, ena dua mada ga na gauna lekaleka sara, ko na katona ka na tiko na gauna ena lasika cake mai kina ena gauna ni nomu malumalumu vakayalo me na tarova na nomu via vorata rawa. Na kena vakayacori e dua na itovo dodonu sa vua ni vakanananu savasava, ka dau veivakayaloqataki mai na kena wiliki na ivola vinaka, veivosaki, sere kei na ivakatagi, kei na itukutuku tale eso.

E vuqa na tamata era a vakacacani ena gauna ni ra se qai tubu cake tiko kina se era sa vakatara ki na nodra bula me ra vakatovotovotaka na veidauci ni ra se tamata gone sara. Kevaka a yaco vei iko na ka oqo, mo kila vakavinaka tiko ni nodra veivakacacani na tamata eso se na veika o a sotava ni ko se gone kina me kakua ni mai vakatotoganitaka tu na yalomu ena gauna oqo, sega na kemu yaga, se sa vakanadakui iko na Kalou se na Nona Lotu. Na bula cidroi vakagone lailai e a yaco taumada e sega ni dodonu me mai vakayarayarataka

kina e dua na gone me veivinakati vakatagane se vakayalewa vata ni sa uabula.

Ko na yaco mo tamata qaqa ena nomu vakatulewataka vakadodonu na nomu bula ni ko vakania tikoga na nomu bula vakayalo. Na nomu sega tu ni kana ena dua na gauna balavu, ka oti o ya mo qai laki kana tu vakasivia, ena sega ni tu vinaka kina na nomu bula vakayago. Sa vakakina, na nomu vakawalena tu ga na nomu vakania na yalomu, kei na nomu vakania vakalevu ena dua ga na gauna, ena sega ni tautauvata na ka e rawa mai kina me vakataka ni ko dau vakayacora mo vakania na yalomu ena kena gauna tudei, ena veisiga.



“Toso Tikoga Ki Liu”

Sa yalataka oti tu o Peresitedi Gordon B. Hinckley ni ko ira era veivinakati vakatagane se yalewa vata era sega ni vakaraitaka e matanavotu na nodra gagano vakayago sa rawa me ra “toso tikoga ki liu me vakataki ira na lewe ni Lotu” (“What Are People Asking about Us?” *Ensign*, Nov. 1998, 71). Kevaka mo na bula voli ena ivakatagedegede sa tuvanaka tu na Kalou ka vakaogai iko ena veicakacaka vinaka e yaga, ena yaco me taucoko na nomu bula ena inuinui ka na rawa me na yaco mai vei iko na veimadigi eso ni cakacaka e vakaibalebale cake vakalevu, na veimaliwai kei ira na tamata, kei na tubu vakayalo ena bula oqo.

Sa qai ka yaga dina sara mo laki raici nomu bisopi kei ira na iliuliu ni matabete sa tu vei ira na idola ni veivakasalataki vakalou me baleti ira na lewenilotu ena nomu tabanilotu ena Lotu. Ena yaloma-lua sa rawa mo gole yani ka laki tukuna na ka dina vei ira, era na qai ciqomi iko ena veikauwaitaki kei na loloma ka vakasalataki iko vakakina. Eratou kaya vakaoqo na Mataveiliutaki Taumada: “Keitou vakayaloqaqataki ira na iliuliu ni Lotu kei ira na lewenilotu me ra veiqaravi ena loloma ka veikilai vakavinaka kei ira era vakatotogani tu ena leqa oqo. Ena vuqa vei ira era na saumaki lesu mai ni ra sota-vi ena loloma sa Vakarisito kei na ivakasala e veivakauqeti” (ivola, Nove. 14, 1991). Sa dau veivuke talega vakalevu me ra veivakasalataki talega o ira na kena dau ni ivakasala ena leqa vakaoqo ka ra sa matua tu ena ivakavuvuli ni kosipeli ka ra dau cakacaka vakavoleka vata kei ira era veivinakati vakatagane se vakayalewa vata.

Ni ko sasagataka mo vukei mai vei ira na tamata eso, mo qarauna mo kakua sara ni vakararavi vakatabakidua vei ira me baleta na kena vaqacacotaki na nomu bula vakayalo. Sa rawa talega vua na nomu bisopi kei ira na iliuliu tale eso mera vakasalataki iko ka vakatavulici iko ena ivakavuvuli dina ni Kalou sa tuvanaki tu me baleti ira na Luvena, ia na kena iusutu duadua ga ni kaukauwa veitokoni o gadreva sai koya na kena e tadu mai vua na Turaga ena gauna o vakarorogo vagumatua kina ki na veivakauqeti ni Yalo Tabu ka mo vakabauti Jisu Karisito tikoga. Sa qai rawa kina ni wali na veika kecega ka yaco mo vakaukauwataki mo dro bula rawa mai na itovo kei na veivakananau sa sega ni vinaka vua na Kalou.

Sa vuqa sara na Yalododonu Edaidai era a veivinakati tu vakatagane se vakayalewa vata era sa muataka yani ki liu na nodra bula ena nodra sa vakayacora sara tikoga na ivakatagedegede ni kosipeli, era sa volekata tikoga na Turaga, ka ra sa vakatara me ra vukei tiko vakalotu kei na veiqaravi vakavuku eso ena gauna e gadrevi kina. Sa yaco kina me vinaka sara na nodra bula ka veivakacegui, ka sa rawa ni vakadeitaki vei ira ni veivakalougatataki kece sara ni bula tawamudu ena yaco dina me nodra.

Na kena vakavulici na kosipeli e dau duidui sara vakalevu mai na kena iwalewale e dau vakavulica ko vuravura me baleta e vuqa na veiulutaga, ka oka kina na itovo savasava. Na duidui e vu mai na noda kila vakavinaka tu na isolisoli ni bula tawamudu sa vakarautaka oti tu vei keda na Tamada Vakalomalagi kei na veika sa lavaki tu me da ciqoma rawa kina. Ena dravusakulukulu me dua na tamata me na vakuwai mai na isolegi ni loloma ni Kalou se mai na veiqaravi ni Nona Lotu, baleta ga ni da sa luvena tagane se yalewa kece sara na Kalou. Me vaka a kaya kina o Peresitedi Hinckley: "Eda sa lomani ira dina vakalevu na wekada era vakatotogani tu ena yalo ni veivinakati vakatagane se vakayalewa vata. Keimami na dau nanumi kemuni tikoga ena mata ni Turaga, keimami dua-vata ena nomuni rarawa vakaoqo, sai kemuni na taci keimami kei na ganei keimami" ("Stand Strong against the Wiles of the World," *Ensign*, Nove. 1995, 99).

NA LOTU I
JISU KARISITO
NI YALODODONU
EDAIDA I

© 2007 Intellectual Reserve, Inc.
Dodonu kece e taqomaki
Tabaki e Amerika
Vakadonui me Vakavalagi: 04/07
Vakadonui me vakadewa: 04/07
iVakadewa ni *God Loveth His Children*

